

## Машаққат пайтидаги саховат



МАШАҚҚАТ ПАЙТИДАГИ САХОВАТ

14:00 / 28.01.2023 1369

Усмон розияллоху анхунинг саховатли, муруватли инсон эканликларини таъкидлайдиган ҳолатлардан бири Абу Бакр розияллоху анху давларида бўлган воқеадир.

Ибн Аббос розияллоху анхумо ривоят қиладилар “Абу Бакр Сиддиқ розияллоху анхунинг давларида ёғингарчилик бўлмай, қаҳатчилик келди. Одамлар Абу Бакр розияллоху анхунинг олдиларига тўпланиб, “Ёғингарчилик бўлмади, ердан нарса унмади, одамлар ниҳоятда машаққат ичидан қолдилар” дейишди. Шунда Абу Бакр розияллоху анху “Тарқалинглар, сабр қилинглар! Кариим Аллоҳ кеч кирмасидан сизларнинг машаққатингизни аритади” дедилар.

Кўп ўтмай, Усмон розияллоху анхунинг карвони Шомдан етиб келди. Буғдой ёки таом ортилган юзта туя кириб келди. Одамлар Усмон розияллоху анхунинг эшиклари олдида тўпланиб, эшикни тақиллатдилар. Усмон розияллоху анху бир неча кишилар билан уй ичидан чиқдилар ва “Нима истайсизлар?” дедилар. Келганлар “Қаҳатчилик юз берди. Ёмғир ёғмайди, ердан гиёҳ унмайди. Инсонлар жуда қийин аҳволда қолдилар. Бизга маълум бўлишича, сизда озиқ-овқат бор экан. Ўшани бизга сотсангиз, мусулмонларнинг фақирларига (сотиб), ёрдам қилардик” дейишди. Шунда Усмон розияллоху анху “Бажонидил, қани, уйга киринглар, маҳсулотни сотиб олинглар” дедилар. Савдогарлар Усмон розияллоху анхунинг уйларига кириб, озиқ-овқат борлигини кўришди. Усмон розияллоху анху улардан “Савдогарлар! Шомдан сотиб олган

нарсаларимга қанча фойда бермоқчисизлар?” деб сўрадилар. Улар “Ўнга ўн икки” дейишиди. (яъни ўн дирҳамга олган нарсангизни ўн икки дирҳамга сотиб оламиз дейишиди). Усмон розияллоҳу анҳу “Бундан кўпроқ берадиган бор” дедилар. Савдогарлар “Ўнга ўн беш” дедилар. Усмон розияллоҳу анҳу “Бундан кўпроқ берадиган бор” дедилар. Савдогарлар “Эй Абу Амр, Мадинада биздан бошқа савдогар йўқ. Бундан кўпроқ берадиган ким?” деб сўрашди. Шунда Усмон розияллоҳу анҳу “Аллоҳ таоло ҳар бир дирҳам учун ўн беришни ваъда қилди. Сизлар бундан ҳам ошира оласизми?” дедилар. Улар “Йўқ” дейишиди. Шунда Усмон розияллоҳу анҳу “Аллоҳни гувоҳ қилиб айтаманки, ушбу озиқ-овқат мусулмонларнинг фақирлариға садақадир” дедилар”.

Абдуллоҳ ибн Аббос розияллоҳу анҳумо ушбу воқеага изоҳ сифатида шундай деганлар “Кечқурун тушимда Расулуллоҳ соллаллоҳу алайҳи васалламни кўрдим. У зот соллаллоҳу алайҳи васаллам оқ-қора йўлли улов устида кетяптилар. Устларида нурдан бўлган либос, оёқларида нурдан бўлган шиппак, қўлларида нурдан бўлган қамиш (қамчи) бор бўлиб, тезлаб бораётган эдилар. “Аллоҳнинг Расули! Сизни, сўзингизни жуда соғинганман. Қаерга кетяпсиз?” дедим. Шунда у зот соллаллоҳу алайҳи васаллам “Хой, Ибн Аббос, Усмон садақа қилди. Аллоҳ ўша садақани ундан (Усмондан) қабул қилиб, уни жаннатдаги бир ҳурга уйлантириди. Ўша тўйга чақирилганмиз” дедилар”.

Усмон розияллоҳу анхунинг қўли очиқликлари, саховатлари, Аллоҳнинг розилигини, мусулмон биродарларининг ҳожатинираво қилишни дунё бойлигидан устун қўйишлари ана шу даражада эди. Биз ҳам ён атрофимиздаги диндош биродарларимизга ёрдам қўлини чўзсак, инشاа Аллоҳ, бунинг мукофотини дунёда ҳам, охиратда ҳам кўрамиз. Айниқса, бу каби садақани коронавирус сабабли карантин эълон қилинган, кўпчилик bemorlik, карантин сабабли меҳнат қила олмаётган, рўзфор тебратишга қийналаётган лаҳзаларда қилсак, савоби янада кўпроқ бўлади.

Аллоҳ таоло барча содик саҳобалардан, жумладан, ҳазрати Усмондан рози бўлсин! Барчамизни Ўзининг ҳидоятидан айирмасин ва хотимамизни чиройли қилсин!

**Нозимжон Ҳошимжон**